

Los ntawm Thawj Tswj Hwm
Thomas S. Monson



Siv Siv Hawm rau tus Cawm Seej

Twb txog ib lub caij Christmas dua thiab yuav pib xyoo tshiab. Zoo nkaus li nag hmo xwb peb twb ua koob tsheej txog tus Cawm Seej txoj kev yug los thiab cuab hom phiaj tshiab.

Xyoo no peb puas tau cuab hom phiaj kom siv sij hawm nyob hauv peb lub neej thiab kho ib qho chaw nyob hauv peb lub siab rau tus Cawm Seej? Txawm peb ua zoo npaum li cas ua raws li peb tej hom phiaj los, kuv paub tias peb sawv daws xav ua zoo dua. Lub caij Christmas yog ib lub sij hawm zoo tshaj plaws ntsuam xyuas thiab rov qab sib zog ua raws li peb tej hom phiaj.

Nyob hauv peb lub neej uas muaj hauj lwm ntau ua, yeej muaj ntau yam uas peb tsum ntsoov rau, peb yuav tsum ua tib zoo rau siab ua hauj lwm kom koj Yexus Khetos los rau hauv peb lub neej thiab nyob hauv peb lub tsev. Thiab peb yuav tsum ua zoo li cov Neeg Txawj Ntse los ntawm Sab Hnub Tuaj, tsum ntsoov rau Nws lub hnub qub thiab “tuaj pe hawm nws.”¹

Txij thaum ub los txog lub sij hawm no, Yexus txoj moo yeej tsis tau hloov. Rau Petus thiab Adales nyob ntawm ntug dej Kalilais, Nws hais tias “Cia li nrog kuv mus.”² Rau Filipis nws hais tias, “Cia li nrog kuv mus.”³ Rau tus Neeg Levis uas zaum ntawm lub rooj sau se Nws hais tias, “Cia li nrog kuv mus.”⁴ Thiab rau nej thiab rau kuv, yog peb yuav mloog lus, Nws yuav caw peb zoo ib yam thiab: “Cia li nrog kuv mus.”⁵

Thaum peb xyaum ua raws li Nws ua niaj hnub no thiab thaum peb koj raws li Nws tus yam ntxwv, peb yuav muaj cib fim foom koob hmoov rau lwm tus lub neej.

Yexus caw peb los pub peb tus kheej rau lwm tus thaum Nws hais tias tus Tswv kom neeg yuav tsum muaj lub siab thiab kev txaus siab ua.⁶

Puas muaj leej twg uas nej yuav tsum pab thaum lub caij Christmas no? Puas muaj leej twg uas tos nej mus xyuas nws?

Ntau xyoo tas los kuv tau mus xyuas ib tug poj ntsuam laus thaum lub caij Christmas. Thaum kuv nyob ntawd, lub tswb ntawm qhov rooj nrov. Nyob ntawd muaj ib tug kws kho mob uas muaj npe nto moo thiab muaj hauj lwm ntau ua. Tsis tau muaj leej twg hu kom nws tuaj; tiam sis, nws txais kev tshoov siab mus xyuas ib tug neeg mob uas kho siab heev.

Nyob hauv lub caij Christmas no, cov neeg uas mus tsis tau qhov twg xav tau tib neeg tuaj xyuas lawv. Muaj ib hnub Christmas thaum kuv mus xyuas ib qhov chaw rau neeg laus nyob, kuv zaum thiab sib tham nrog tsib tug poj laug, tus laus tshaj muaj 101 xyoos. Nws dig muag, tiam sis nws paub kuv lub suab.

Nws hais tias, “Npisov, xyoo no koj tuaj lig me ntsis! Kuv xav tias koj yeej yuav tsis tuaj.”

Peb zoo siab sib tham ua ke. Tiam sis muaj ib tug neeg laus uas saib ntsoov ntawm qhov rais thiab pheej rov qab hais tias, “Kuv paub tias kuv tus tub yuav tuaj xyuas kuv hnub no.” Kuv xav paub seb nws puas tuaj tiag tiag vim twb muaj lwm lub caij Christmas es nws tsis tau tuaj.

Tseem tshuav sij hawm xyoo no kom ncav tes mus pab lwm tus, muaj siab hlub, thiab lub siab xav pab—tseem tshuav sij hawm ua raws li peb tus Cawm Seej tus yam

ntxwv thiab pab lwm tus ib yam li Nws xav kom peb ua. Thaum peb ua hauj lwm rau Nws, peb yuav tsis tso lub cib fim tseg, zoo li tus tswv tsev thaum ub,⁷ lub cib fim uas peb muaj kom siv sij hawm rau Nws nyob hauv peb lub neej thiab npaj chaw rau Nws nyob hauv peb lub siab.

Peb puas muaj peev xwm to taub cov lus cog tseg zoo kawg uas tus tsim tswv hais rau cov tswv yug yaj nyob hauv tshav zaub hais tias: “Kuv . . . coj txoj moo zoo uas yog txoj kev zoo siab kawg nkaus. . . Hnub no nej tus Cawm Seej twb yug los . . . [ib tug Cawm Dim], nws yog Khetos uas yog tus Tswv?”⁸

Thaum peb ib leeg pub khoom plig rau ib leeg thaum lub caij Christmas, thov kom peb nco ntsoov, ris Vajtswv txiaj, thiab txais lub txiaj ntsim zoo tshaj plaws—lub txiaj ntsim los ntawm peb tus Cawm Seej thiab tus Txhiv Dim kom peb yuav muaj txoj sia nyob mus ib txhis.

“Yog tias muab ib lub txiaj ntsim rau ib tug neeg, tiam sis nws tsis kam txais lub txiaj ntsim ntawd, ces yuav muaj nqi dab tsi rau nws? Saib seb, nws tsis zoo siab rau qhov uas tau muab rau nws, yeej tsis zoo siab rau tus uas tau muab lub txiaj ntsim ntawd rau nws.”⁹

Thov kom peb yuav nrog Nws mus, ua hauj lwm rau Nws, hwm Nws, thiab txais Nws tej txiaj ntsim nyob hauv peb lub neej, kom peb yuav muaj raws li Lihais hais tias, “nws txhais caj npab ntawm nws txoj kev hlub tab tom ua voj voog ncig kuv mus ib txhis li.”¹⁰

LUS CIM

1. Mathais 2:2.
2. Mathais 4:19.
3. Yauhas 1:43.
4. Mathais 9:9.
5. Lus Qhuab Qhia thiab Kev Khi Lus 38:22.
6. Lus Qhuab Qhia thiab Kev Khi Lus 64:34.
7. Saib Lukas 2:7.
8. Lukas 2:10–11.
9. Lus Qhuab Qhia thiab Kev Khi Lus 88:33.
10. 2 Nifais 1:15.

QHIA LOS NTAWM TSAB XOY NO

Thawj Tswj Hwm Monson hais kom peb “yuav tsum ua tib zoo rau siab ua hauj lwm kom coj Yexus Khetos los rau hauv peb lub neej thiab nyob hauv peb lub tsev.” Cia li xav seb puas xav sib tham nrog cov uas koj qhia hais tias lawv txhua tus thiab lawv tsev neeg yuav ua li cas thiaj ua tib zoo ua hauj lwm li no. Tej zaum koj yuav xav hais kom lawv xav txog ib tug neeg los sis ib

tsev neeg uas lawv yuav xav mus xyuas los sis mus pab thaum lub caij Christmas no. “Xyoo no tseem muaj sij hawm ncav tes pab lwm tus, muaj siab hlub, thiab lub siab xav pab.”

TUB HLUAS NTXHAI S HLUAS

Tej txoj Kev Pab Lwm Tus Thaum lub Caij Christmas

Thawj Tswj Hwm Monson siv sij hawm mus xyuas cov neeg laus thiab cov uas nyob hauv qhov chaw tu neeg laus, qhov tseem ceeb yog thaum lub caij Christmas. Nws hais tias muaj ib txhia uas zoo siab vim muaj neeg tuaj xyuas lawv, tiam sis lwm tus cia siab tias yuav muaj neeg tuaj uas pheej tsis tuaj. Muaj neeg uas tos lwm tus tuaj—tej zaum thaum lub caij Christmas no, koj yog tus uas yuav mus xyuas lawv.

Tej yam nram qab no yog ob peb yam uas koj ua tau pab kom tsis muaj leej twg uas kho siab thaum lub caij Christmas no. Cia li xav seb puas muaj lwm yam uas koj ua tau kom pab koj tej neeg zej zog thaum lub caij no. “Puas muaj leej twg uas tos nej mus xyuas lawv?”

- Cia li ua ib daim Christmas kom xa rau cov tub txib thiab cov mej zeej laus thiab cov uas tsis tau yuav poj niam los sis yuav txiv nyob hauv koj pawg ntseeg los sis ceg ntseeg.
- Ua hauj lwm pub dawb rau ib lub koom haum hauv koj lub nroog.
- Muab tej Phau Ntawv Maumoos ua khoom plig rau koj cov phooj ywg thiab neeg zej zog.
- Mus xyuas cov neeg laus nyob hauv koj pawg ntseeg los sis tsev neeg.
- Ua khoom qab zib pub rau koj cov neeg zej zog.

COV ME NYUAM

Raws Qhov Kaj

Tom qab Yexus yug los, cov Neeg Txawj Ntse pub khoom plig rau Nws. Lawv raws ib lub hnub qub tshiab uas ci ntsa iab kom nrhavi tau Nws. Koj yuav muab khoom plig twg pub rau Yexus thaum lub caij Christmas no?



**Kev Ntseeg,
Tsev Neeg, Kev Pab**

Tej Cwj Pwm ntawm Yexus Khetos: Kev Hlub Tshua thiab Kev Ua Siab Zoo

Ua tib zoo thov Vajtsuv kawm tej yam no thiab nug seb koj yuav tsum qhia dab tsi. Qhov uas koj to taub tus Cawm Seej tej cwj pwm yuav ua rau koj txoj kev ntseeg Nws loj tuaj thiab foom koob hmoov li cas rau cov uas koj mus saib xyuas tom tsev? Kom tau ntauw ntauw xov xwm ntxiv, cia li txuas rau reliefsociety.lds.org.

Nov yog ib zaj los ntawm tej zaj cov Mus Saib Xyuas Tom Tsev tsab Xov uas hais txog tus Cawm Seej tej cwj pwm.

“Nyob hauv vaj lug kub, kev khuv leej txhais hais tias ‘yus raug txom nyem nrog lwm tus.’ Kev khuv leej txhais hais tias yus pab lwm tus to siab, thiab hlub lwm tus.”¹

Thawj Tswj Hwm Thomas S. Monson hais tias, “Yexus coj yam ntxwv kom peb paub hlub lwm tus. “Tus txiv neej ceg tawv nyob ntawm lub pas dej Npexathas; tus poj niam uas lawv ntes thaum nws tab tom deev hluas nraug; tus poj niam nyob ntawm Yakhauj lub qhov dej; Yailus tus ntxhais; Laxalus, Maivliag thiab Mathas tus nus—txhua tus yog ib tug uas raug txom nyem nyob ntawm txoj kev mus rau Yelikaus. Txhua tus xav tau kev pab.

Rau tus uas ceg tawv nyob ntawm lub pas dej Npexathas, Yexus hais tias, ‘Koj cia li sawv, yaws koj daim lev thiab mus.’ Rau tus poj niam uas ua txhaum Yexus ntuas hais tias, ‘Koj cia li mus tsev thiab tsis txhob ua txhaum ntxiv lawm.’ Kom pab tus poj niam uas los hais dej, Nws muab cov dej uas ‘yuav txhawv hauv nws lub siab thiab cawm nws.’ Rau Yailus tus ntxhais uas twb xiam lawm, Yexus txib hais tias, ‘Me ntxhais, kuv hais rau koj

hais tias koj cia li sawv tsees.’ Nws hais rau Laxalus uas nyob hauv lub ntxa hais tias, ‘Koj cia li tawm los.’

“Tus Cawm Seej yeej txaus siab muaj kev khuv leej mus ib txhis li. . . . Thov kom peb qhib peb lub siab, cia Nws—tus uas coj yam ntxwv txog kev khuv leej—yuav nkag mus hauv.”²

Vaj Lug Kub Ntxiv

Phau Ntawv Nkauj 145:8; Xakhaliyas 7:9; 1 Petus 3:8; Mauxiyas 15:1, 9; 3 Nifais 17:5–7

Los ntawm cov Vaj Lug Kub

Linda S. Reeves, tus pab cuam thib ob hauv lub Koom Haum Niam Tsev tuam pawg thawj tswj hwm hais tias, “Kuv tus txiv wb txhos caug thov kom cawm wb tus ntxhais uas muaj 17 xyoo. Zaum no tsis tau, tiam sis peb thiaj li paub zoo . . . tias . . . [tus Cawm Seej] muaj kev hlub tshua rau peb tej kev tu siab thiab kev raug mob.”³

“Ib zaj dab neeg ua kuv nyiam heev txog tus Cawm Seej lub neej yog zaj uas hais txog Laxalaus. Vaj lug kub qhia peb hais tias ‘Yexus hlub Mathas, . . . Mathas tus niam hluas [Maivliag], thiab [nkawd tus nus] Laxalus heev.’”⁴ Thaum Laxalus mob heev, nkawd xa xov

rau Yexus, tiam sis thaum Nws tuaj txog Laxalus twb xiam lawm. Maivliag khiav mus cuag Yexus, txhos caug ntawm Nws ko taw, thiab quaj. Thaum Yexus pom Maivliag quaj, “nws nyuaj siab kawg, thiab . . . nws txawm quaj” (Yauhas 11:33, 35).”

“Nov yog hais rau peb. Peb yuav tsum paub thiab pom rau peb tus kheej ces peb mam li pab tag nrho Leej Txiv Saum Ntuj Ceeb Tsheej cov me nyuam kom paub thiab pom thiab paub tias Nws tau ris peb tej kev txhaum, kev raug mob, thiab kev txom nyem kom nws thiaj li paub nplij peb tej siab.”⁵

LUS CIM

1. Guide to the Scriptures, “Compassion.”
2. Thomas S. Monson, “The Gift of Compassion,” *Liahona*, Peb Hlis Ntuj 2007, 4–5, 8.
3. Linda S. Reeves, “The Lord Has Not Forgotten You,” *Liahona*, Kaum Ib Hlis Ntuj 2012, 120.
4. Linda S. Reeves, “The Lord Has Not Forgotten You,” 118.
5. Linda S. Reeves, “The Lord Has Not Forgotten You,” 120.

Xav Txog Qhov No

Leej twg yuav tau koob hmoov los ntawm koj txoj kev khuv leej?